



Rapport annual dil president pigl onn 2022

Il suandont rapport dat ina survesta digl occurriu en nossa pleiv, oravontut dallas fatschentas che han occupau la suprastanza da pleiv el decuors digl onn 2022.

1. En general

Per la pleiv da Breil ei igl onn 2022 sesviluppau senza surprisas negativas a norma dils onns vargai. Nossa cuminonza ei stada preservada da disgrazias e catastrofes ed ha aschia astgau viver en pasch e concordia. In entagl en la veta e purschida dalla pleiv ha la pandemia da Corona caschunau el decuors dils dus onns vargai. Las sentupadas da nossa cuminonza, seigi quei en connex cun messas, devoziuns sco era cun ulteriras occasiuns ein stadas restrenschidas e sereducidas bravamein.

Quei che dat da patertgar ed ei in ver quitau per nossa cuminonza ei il cuntinuau trend en caussa extrada dalla baselgia. Nudavan nus egl onn 2014, 2 extradadas ei la situaziun semidada cuntinuadamein el decuors dils onns. Aschia havein nus stuiu prender encunter l'extrada da 13 parochians el decuors digl onn 2022. La media el decuors dils davos 9 onns munta a 7 personas/onn.

Cheu stuein nus tschentar la damonda: Tgei maunca en la purschida da nossa cuminonza da pleiv e dalla baselgia catolica? Ei quella buca pli attractiva e da basegns pil viver da mintgadi? Ni eis ei plitost la raschun digl individualissem che sederasa adina dapli en nossa societad e che procura era en uniuns in digren da commembers/as? Tgei savein nus sez ed era ils responsabels dalla Baselgia far per frenar quei trend?

In radi da speranza ed indezi da prosperitad ein per nus en quella situaziun las biaras personas engaschadas sin basa voluntaria e cun gronda premura en las differentas scharschas e pensums da nossa pleiv. In grond ed apprezziau survetsch!

2. Pastoraziun e cuminonza

Nies plevon Sur Sajan seviva en d'onn tier onn pli profund en nossa mentalitad e cuminonza parochiala. Per nossa pleiv ina gronda grazia che meretta nies profund engraziament. Risquardond la situaziun actuala cun la scartezia da plevons essan nus e nossa pleiv fetg bein survi cun in agen e bien pastur. Aschia eis ei nies duer ed era segn da renconuschientscha da sustener nies plevon Sajan aschia lunsch e ferm sco pusseivel.

Il bien contact che Sur Sajan tgira cun sia patria ed uestgiu ei era staus la raschun che nossa pleiv ha astgau beneventar a caschun dalla Perdanonza da Nossadunna d'uost il Cardinal Baselius Cleemis ord las Indias. Ensemen cul Cardinal Baselius, siu assistent Zacharia e nies plevon sur Sajan ei la messa solemna vegnida celebrada e silsunter l'usitada processiuin succedida cun parada, musica e pievel da perdanoza. Per nossa pleiv ina fetg biala sentupada ed ina gronda e singulara honur.

Grazia al grond e permanent engaschi da nies plevon Sur Sajan ha nossa cuminonza en tuttas 4 pleivs astgau guder el decuors digl entir onn vargau la purschida da devoziuns e messas en la rama usitada ed in bien contact cun nies plevon. Il retardament e la munconza dalla nova via da comunicaziun denter Breil e Vuorz engrevegia la cooperaziun ed ils contacts enteifer nossa cuminonza da pleiv.

Sper il grond engaschi da nies plevon Sur Sajjan ei nossa cuminonza era visada vi sigl indispensabel sustegn e la cooperaziun da parochianas e parochias en las differentas scharschas e pensums dalla pleiv. Per nossa cuminonza entira ei quei engaschi ed era la cooperaziun da giuven e vegl en las differentas gruppaziuns, per ex. en chors baselgia, societads da musica, uniuns da giuventetgna, uniuns da dunnas e mummas eav. da gronda valur.

Sco segn d'engraziament pil grond survetsch ha la pleiv organisau, la sonda ils 14 da matg 2022 ina sentupada ed excursiun cun las personas engaschadas els differents pensums. Il viadi ha menau ils 30 participonts a Cuera tier la Cuort episcopala. Suenter la viseta dil museum dalla cathedrala ed in gentar communabel ha vicari general, Jürg Stuker surpriu la gruppa e presentau il casti episcopal cun la caplutta digl uestg. Suenter ina biala ed interessanta scuntrada ei la gruppa returnada casa.

3. Lavur da suprastonza

Suenter 5 onns dapi la decisiun da fusiun cun la pleiv d'Andiast astgein nus oz constatar che la cooperaziun enteifer la nova pleiv, existenta ord las anteriuras pleivs da Breil, Dardin, Danis/Tavanasa ed Andiast funcziunescha bein. La fusiun dallas 4 pleivs possibilitescha la coordinaziun dalla pastoraziun ed administraziun a moda effizienta.

La nova grondezia ha denton era slargau ils pensums ed augmentau la responsabaladad ton davart dalla pastoraziun sco era dalla suprastonza da pleiv. Il quitau dil numerus diember d'objects, da baselgias, capluttas, casas pervenda, schischom da construcziun e fons d'agricultura pretendan in permanent engaschi. En connex cun 6 sedutas ha la suprastonza deliberau ils pensums adossai ad ella tenor meglier saver e puder. A caschun dalla radunonza generala dils 30 d'avrel 2022 ha ella informau e suttamess las differentas fatschentas per decisiun ed approvaziun alla cuminonza da pleiv. Enteifer la suprastonza regia in bien spert ed activa cooperaziun. Pil bien sustegn e grond engaschi da mes consuprastonts engraziel cordialmein.

Las incumpensas principalas el decuors digl onn 2022 ein stadas:

- La survegionza ed il quitau dils beins ed objects, numnadamein la preparaziun da lavurs da manteniment vid las baselgias da Dardin ed Andiast.
- Las contractivas cun las differentas instanzas cantunales e dalla Confederaziun concernent la lubientscha e las contribuziuns da subsidi per la sanaziun dalla caplutta Sogn Sievi.
- L'administraziun ed il quitau dallas finanzas dalla pleiv.
- Contracivas per dretg da baghegiar el quartier Ruast.
- Nova affitaziun dil fons pervenda per la perioda 2022-2027, enteifer ils vischinadis da Breil, Dardin e Danis/Tavanasa.
- La procura da calusters/pedels baselgia e gidonters/as en las differentas scharschas dalla pleiv.
- Accumpignament dalla sanziun dils santeris a Dardin ed Andiast.
- L'organisaziun dalla sentupada da funcziunaris dils 14 da matg 2022
- La sentupada cun la delegaziun e suprastonza dalla pleiv da Wallisellen, ils 4 da zercladur 2022.
- Coordinaziun da lavurs da garanzia vid la baselgia parochiala Breil

4. Objects, beins e fons dalla pleiv

5.

Tier la sanaziun dalla baselgia parochiala Breil, terminada avon 2 onns ein singulas lavurs da garanzia vegnidas exequidas el decuors digl onn 2022. Aschia ha la cummissiun incaricada cun la sanaziun baselgia saviu tener la davosa seduta ils 15 da zercladur 2022. Cun quella caschun ei il quen definitiv vegnius presentaus ed

approbaus. Sper ils cuosts totals da 1'388'294.80 frs. ein las differentas contribuziuns en la valur totala da frs. 944'289.30, realisadas entras subsidis da vart tgira da monuments, dalla Baseligia cantunala e vischnaunca politica sco era il recav ord atgnas acziuns, vegnidas pridas per enconuschientscha. Ils cuosts che la pleiv sezza ha la finfinala da cuvierer muntan a frs. 394'005.50. In grond engraziament per quei fetg impurtont sustegn e per gl'indinau engaschi dalla cummisiun da baghegiar.

La sanaziun dalla caplutta Sogn Sievi, stada previda el decuors digl onn 2022 ha en consequenza dil schliet stadi e remplazzament dalla cuvrada dil tetg da slondas stuiu vegnir messa anavos. Aschilunsch che la hodierna radunonza da pleiv conceda il corrispudent credit supplementar sa la sanaziun succeder enteifer igl onn 2023 sil pli tard 2024.

In ulteriur project ei la sanaziun dalla baseligia d'Andiast. Malgrad che las pli urgentas munconzas ein vegnidas messas en uorden igl onn 2019 sto ina sanaziun cumpleina vegnir tratga en consideraziun el decuors dils onns vegnents. Las corris-actualmein en preparaziun.

6. Squard egl avegnir

Nossa pleiv ei fetg bein survida cun gl'engaschi e la lavur da nies plevon Sur Sajan. Nies plevon ei s'integraus fetg bein e dat gronda breigia pil contact cun giuven e vegl. Plinavon s'engaschan cun breigia pliras persunas ord nossa cuminonza, chors baseligia ed uniuns per mantener activa ed attractiva la purschida a nossa cuminonza. Senza quei sustegn fuss il survivor da nossa pleiv a liunga vesta veramein periclitau!

Per finir in cordial engraziament:

- A Sur Sajan per sia gronda lavur e buna cooperaziun ed oravontut pils bials survetschs divins. En quei connex in cordial engraziament a tut tgi che ha segidau cun Sur Sajan sin ina moda u l'otra.
- A nossa secretaria Petronella, allas catechetas ed a tuttas persunas engaschadas en nossa pleiv, lecturs/as e ministrants, als commembers/as dil cussegl pastoral, als calusters/as, pedels ed ugaus caplutta, agl archivar, organists, dirigents e chors baseligia sauda en qust liung menziun ed engraziament.
- A mes collegas consuprastonts pil grond sustegn e la buna e biala cooperaziun.

Alla fin da miu rapport vulein nus era seregurdar da nossas vischinas e nos vischins che han el decuors digl onn vargau stui suandar il clom da Sura e bandunau nus per adina. Ad els sauda nies engraziament per tut prestau e per la buna convivenza durant biars onns. Els ruassien en pasch !

(Sesalzar per in cuort mument da silenzi en regurdentscha da nos defuncts.)

Ussa siarel miu rapport cul giavisch per in fritgeivel prosperar da nossa cuminonza e cun la speranza sin ina cuntinuada buna cooperaziun. Miu pli cordial engraziament per tut sustegn e cooperaziun en favur da nossa pleiv e cuminonza parochiala.

Breil, entschatta fevrer 2023, SC